

Kalaallit Nunaanni pinerluttulerinermik inatsit naapertorlugu inissiisarfimmiitanut toqqammavigisassanik toqqaasarneq pillugu nalunaarut

Kalaallit Nunaanni Eqqartuussisarneq pillugu inatsimmi § 163, imm. 3 naapertorlugu inatsit nr. 306 apriliip 30-anni 2008-meersoq naapertorlugu makku aalajangersarneqarput:

Kapitali 1

Toqqammavigisassanik sulilersitsisarneq

§ 1. Kalaallit Nunaanni Politimesterip kommunini oqartussaasunit innersuussuteqareerneratigut toqqammavigisassat amerlassusii aalajangersimasut Kalaallit Nunaanni najugallit toqqartassavai. Pinerluttunik Isumaginnittoqarfimmi pisortap Københavnimi Kalaallit Illuutaannit innersuussuteqareernikkut toqqammavigisat aalajangersimasumik amerlassusillit Danmarkimi najugallit toqqartassavai.

Imm. 2. Toqqammavigisatut suliffinnut inuttaqanngitsunut qinnuteqaatit saqqummiunneqartassapput tusagassiorfitsigut allagarsiinikkut, suliaqaqatigiit atuagassiaasigut imaluunniit allat aqqutigalugit inuit aalajangersimasut toqqammavigisassanik toqqagassatut immikkut piukkunnaatillit, tak. imm. 3, qularnaarniarlugit.

Imm. 3. Toqqammavigisassat sulilersinneqassapput qinnuteqartut akornanni sulianik toqqagaaffiup piumasarisaanik naammassinnissallutik naleqqunnerpaasorisat, taakkununga ilagitillugit inuit peqqissutsimik, isumaginninnermik aamma ilinniartitsinermik suliaqarfinnut attuumassuteqartut. Sapinngisamik pissarsiarineqartassapput inuit kalaallisut danskisullu oqaluttartut.

Imm. 4. Inuit tarnikkut nappaatillit uninngavianni imaluunniit napparsimmavinni sulisut, inunnut annertunerusumik tarnikkut innarluuteqartuniittut il.il. toqqammavigisatut sulilersinneqartassanngillat inunnut napparsimmavimmi tassani, immikkoortortaq tassani imaluunniit sullissivik tassani suliffillit. Tamannattaq atuuppoq inunnut allatigut innarluutilinnut napparsimmavimmi pisortaqarfimmiluunniit ingerlatsisuusut pisortaasulluunniit suliffiulluunniit pineqartup immikkoortortaani suliffillit. Unnerluussisussaatitaasuni, politeqarfimmi pinerlussimasunilluunniit nakkutilliisoqarfimmi atorfillit toqqammavigisatut sulilersinneqariaqanngillat.

Imm. 5. Toqqammavigisat sulilersinneqassapput politeqarfimmit oqaaseqarfiginnissummik pereernikkut. Politeeqarfiup allassimasutigut akuersisoqareerneratigut paasissutissat pissarsiarissavai Pinerlussimasut Nalunaarsugaaffiannit Tamakkiisumit, oqaaseqarfiginnissut tunniutsinnagu.

Imm. 6. Inuit Kalaallit Nunaanni toqqammavigisatut sulilersinneqartut amerlassusissaat aalajangerneqartassaaq Kalaallit Nunaanni Politimesterimit pisariaqartitsinermik nalileereernerup

kingorna. Inuit Danmarkimi toqqammavigisatut sulilersussat amerlassusissaat aalajangerneqartassaaq Pinerlussimasunik Nakkutilliisoqarfimmit pisariaqartitsinermik nalileereernikkut.

§ 2. Kalaallit Nunaanni Politimesterip suliaritissavaa toqqammavigisatut sulilersitaasimasut Kalaallit Nunaanni nalunaarsuutaat. Pinerlussimasunik Nakkutilliisoqarfiup suliaritissavaa toqqammavigisatut sulilersitaasimasut Danmarkimi najugallit amerlassusianik nalunaarsuut.

Imm. 2. Toqqammavigisatut sulilersitaasimasut Danmarkimi najugallit nalunaarsuutaat Kalaallit Nunaanni Politimesterimut nassiunneqassaaq.

Imm. 3. Toqqammavigisat Kalaallit Nunaanni najugallit amerlassusiata nalunaarsuutaat allannguuteqarpat Kalaallit Nunaanni Politimesterip suliaritissavaa nalunaarsuut misissoqqitaq. Toqqammavigisat Danmarkimi najugallit amerlassusiata nalunaarsuutaa allannguuteqarpat Pinerlussimasunik Nakkutilliisoqarfiup nalunaarsuut misissoqqitaq suliaritissavaa Kalaallit Nunaanni Politimesterimut nassiussassatut.

Kapitali 2

Toqqammavigisassanik toqqaasarneq

§ 3. Toqqammavigisassatut sapinngisamik toqqarniarneqartassapput pasisaasup, unnerluutigisaasup imaluunniit taassuma ilagisai qaninnerit.

§ 4. Politiit ilimagippassuk imaaratarsinnaasooq pasisamut imaluunniit unnerluutigisamut toqqammavigisassatut toqqaasooqarnissaa, apeqqut eqqartuussivimmut ima siusitsigisumik saqqummiunneqassaaq inuk toqqarneqaratarsinnaasooq periarfissaqassasooq suliat suliarineranni najuutissalluni.

Imm. 2. Eqqartuunneqarsimasumut, toqqammavigisassamik taama ittumik toqqaassunneqarsimanngitsumut, suliap ingerlannerani toqqammavigisassanik toqqaasooqassappat, pisariaqassappat apeqqut tamanna politiit eqqartuussivimmut ilisimatitsissutigissavaat, eqqartuussutip nalunaarutiginerani. Eqqartuunneqartoq Kalaallit Nunaanni inissinneqassappat, toqqammavigisassamik Kalaallit Nunaanni najugalimmik toqqaasooqassaaq. Eqqartuunneqartorlu Danmarkimi inissinneqassappat. Toqqammavigisassamik Danmarkimi najugalimmik toqqaasooqassaaq.

Imm. 3. Eqqartuunneqarsimasooq Kalaallit Nunaanni najugalimmik toqqammavigisaqarsimappat suliap ingerlannerani toqqarneqarsimasumik Kalaallit Nunaannilu inissinneqassappat, toqqammavigisaq eqqartuussissutip kingorna ingerlaqqissaaq, imaassimangippat tamanna naleqqutinngitsoq toqqammavigisap najugaa pissutigalugu. Imaassimappat eqqartuussaasooq Danmarkimi najugalimmik toqqammavigisaqarsimasooq suliap ingerlannerani toqqarneqarsimasumik, Danmarkimilu inissinneqartussanngorpat toqqammavigisaq eqqartuussissutip kingorna ingerlaqqissaaq.

Imm. 4. Inuk Danmarkimi inissittussanngorlugu eqqartuunneqarsimasooq pisortatigut Kalaallit Nunaanni inissinneqassasooq, toqqammavigisassamik nutaamik Kalaallit Nunaanni najugalimmik toqqaasooqassaaq. Inuk Kalaallit Nunaanni inissinneqartussatut inissinneqarsimasooq

pisortatigoortumik Danmarkimut inissinneqartussanngorpat, toqqammavigisamik nutaamik Danmarkimi najugalimmik toqqaasoqassaaq.

§ 5. Politiit eqqartuussivik ikiortassavaat inummik toqqammavigisatut toqqarneqartussamik pissarsiormi, matumunnga tak. § 3. Pasisaasoq, unnerluutigisaasoq imaluunniit eqqartuunneqartoq toqqaasoqannginnerani aperineqassaaq inummik aalajangersimasumik toqqammavigiumasarisaminik kissaateqarnersoq.

Imm. 2. Pasisaasoq, unnerluutigineqartoq, imaluunniit eqqartuussaasoq nammineq inummik qanigisanik ilaqutaqanngitsumik imaluunniit arlaannaalluunniit piumasimanngippat imaluunniit toqqarneqarsinnaasutut piukkunnangippata, politiit toqqammavigisassamik innersuussuteqassapput.

Imm. 3. Eqqartuussaasoq Kalaallit Nunaanni inissinneqassappat, innersuussutigineqassaaq toqqammavigisassaaq toqqammavigisatut nalunaarsukkani Kalaallit Nunaanni najugalinni tullinnguuttoq, imaalilluguli toqqaanermi isiginiarneqassasoq toqqaaneq toqqammavigisassap najugaqarnera eqqarsaatigalugu imaluunniit oqaatsitigut pissutsit tunngavigalugit naleqqunnersoq.

Imm. 4. Inuk Danmarkimi inissinneqartussatut eqqartuussaasimasoq pisortatigoortumik Kalaallit Nunaannut nuutsinneqarpat, toqqammavigisamik Kalaallit Nunaanni najugalimmik toqqaasoqassaaq. Inuk Kalaallit Nunaanni inissinneqartussatut eqqartuunneqarsimasoq pisortatigoortumik Danmarkimut inissinneqarpat, toqqammavigisassamik nutaamik Danmarkimi najugalimmik toqqaasoqassaaq.

Imm. 5. Toqqammavigisap pineqartup suliffiani imaluunniit assigisaanni pissutsinik peqarpat, s.i. isumaginninnermi ingerlatsivimmi taassumunnga sulianik ingerlatsinermi taassuminnga sullissisutut, pineqartup pasisap, unnerluutigineqartup imaluunniit eqqartuussaasup soqutigisaanut tunngasunik tutsuiginartumik ingerlatsissalluni piukkunnassusianik qulalersitsissutaasinnaasunik, nalunaarsukkani tulliuuttoq innersuussutigineqassaaq.

Imm. 6. Eqqartuussivimmut innersuussuteqannginnermi toqqammavigisap pineqartoq aamma pasisaq, unnerluutigisap imaluunniit eqqartuunneqarsimasoq periarfissaqassappat innersuussutiginiarneqartoq oqaaseqarfigissallugu. Politiit aammattaaq qularnaassavaat, toqqammavigisap akornutissarsissanngitsoq s.i. angalanermik, napparsimanermik assigisaannilluunniit peqquteqartumik. Politiit peqatigitillugu tunaartarisaq paasissutissisavaat, pasisaasup, unnerluutigineqartup imaluunniit eqqartuunneqartup kina illersuisorineraa. Toqqammavigisap toqqarneqartussatut innersuussutigineqartoq toqqammavigisat nalunaarsuutaani nalunaarsukkanut ivertinneqarsimappat, innersuussuteqannginnermi inuk taanna pillugu paasissutissanik allaganngorlugu akuersissummik Pinerluuteqarsimasut Qitiusumik Nalunaarsugaaffiannit pissarsineqareersimassaaq.

Imm. 7. Toqqammavigisap toqqammavigisat nalunaarsuutaannut ivertinneqarsimasoq piumanngissinnaavoq toqqagassatut innersuussutigineqarnissamut, pasisanut, unnerluutigineqartunut eqqartuussaasimasunulluunniit allanut toqqagaareersimasuuguni.

§ 6. Pasisamit, unnerluutigisamit imaluunniit eqqartuussamit toqqammavigisamik toqqagaareersimasumik allamik taarsiitsiniarluni noqqaassut unnerluussisussaataasunut saqqummiunneqassaaq, taassuma piaarnerpaamik apeqqut eqqartuussivimmut, eqqartuussivittut

periarfissami siullermi eqqartuussisimasumut ingerlatsissallugu.

Kapitali 3

Toqqammavigisap suliaasai piginnaaffilu

§ 7. Toqqammavigisap periartassaaq sapinngisamik pasisaq, unnerluutigisap imaluunniit eqqartuussaasoq siunersioreerlugu.

§ 8. Toqqammavigisap pinerluttulerinermik suliamut tunngasumik toqqagaasimasup, salliutillugu suliaasaraa illersuisutut toqqagaasimasooq peqatigalugu pasisaq, unnerluutigisap imaluunniit eqqartuussaasuliat ingerlannerani tapersersussallugu, tamatumunnga tak. Kalaallit Nunaanni Pinerluttulerinermik Inatsimmi § 163, Imm. 1. Eqqartuussisuttip aalajangersareernerani Kalaallit Nunaanni Pinerluttulerinermik Inatsimmi § 163, Imm. 2 naapertorlugu toqqammavigisap suliaasaraa eqqartuussaasup qanoq innera pillugu malinnaassalluni isumagissallugulu, napparsimmavimmiinneq, imaluunniit napparsimmaviup immikkoortortaaniinneq, isumaginniffimmiinneq inissiisarfimmiinnerluunniit allaniluunniit inissitaaneq inissinneqarnerup pisariaqanera sinnerlugu sivisussuseqassanngitsoq.

Imm. 2. Toqqammavigisap pasisaq, unnerluutigisap imaluunniit eqqartuussaasoq naammagittaalliorsinnaanermik periarfissanik aamma eqqartuussinikkut pineqaatissiissuttip allanngortissinnaaneranik atorunnaarsissinnaaneranillu Kalaallit Nunaanni Pinerluttulerinermik Inatsimmi §§ 157 aamma 162 naapertorlugit qinnuteqaatiginissaannik periarfissanik siunnersussallugu ilitersussallugulu. Toqqammavigisap aammattaq pineqartoq tapersersussavaa naammagittaalliuutaasinnaasut pineqaatissiissuttip allanngortinnissaannik atorunnaarissaanilluunniit saaffiginnissutit ilusilersornissaanni aamma ikiussallugu suliat tamakku suliarineqarnerini.

§ 9. Toqqammavigisap toqqagaanermi kingorna sapinngisamik piaarnerpaamik pulaassavaa pasisaasoq, unnerluutigisaasoq imaluunniit eqqartuunneqartoq, ataavartumillu taanna attavigissallugu. Siullerpaamik pulaarnerup saniatigut pisariaqartitsineq naapertorlugu pulaarneqartassaaq.

Imm. 2. Eqqartuussaasorli Danmarkimut inissinneqarpat toqqammavigisap eqqartuussaasoq pulaartassavaa ikinnerpaamik qaammammut ataasiarluni. Toqqammavigisattaq aamma eqqartuussaasoq ikiortassavaa eqqartuussaasup taassuma ilagisaminut Kalaallit Nunaanniittunut naammaginnartumik attaveqarnissaa eqqartuunneqarsimasullu inuuissionernik, nalliuttunik il.il. malittarinninnissaannik.

Imm. 3. Toqqammavigisap pisinnaatitaavoq akeqanngitsumik akornusersuutitaqanngitsumillu inuttut, allakkatigut aamma oqarasuaatikkut pineqartumik attaveqassalluni. Tamannali atuutinngilaq pasisaq imaluunniit unnerluussaasoq tiggummissaappat Kalaallit Nunaanni Eqqartuussisarneq pillugu Inatsimmi § 359, imm. 1 nr. 2 litra c naapertorlugu, paasiniaanermilu mianerisassat pingaarutillit pisariaqartuutippassuk toqqammavigisap allakkanik pulaarnernillu nakkutilliinermik politiit aalajangersagaannik malitarinnittussaammat. Tassunga tunngasumik aalajangersaasoqarsimatillugu pasisap imaluunniit unnerluutigineqartup illersuisua paasitinneqassaaq, taamattaarlu Kalaallit Nunaanni Eqqartuussisarneq pillugu Inatsimmi §§ 379 aamma 380 naapertorlugit periaaseq naapertorneqassalluni.

§ 10. Eqqartuussiviup qanoq ilisukkut pasisaasumut, unnerluutigisaasumut imaluunniit eqqartuussaasumut eqqartuussinermi suliat ingerlanneqarnissaannik toqqammavigisaq ilisimatittassavaa, tassunga ilagitillugit eqqartuussinermi suliat toqqammavigisassanik toqqartuiffiusussat.

Imm. 2. Pasineqartoq, unnerluutigineqartoq imaluunniit eqqartuunneqartoq pillugu eqqartuussissutit aalajangiinerillu noqqaaneq naapertorlugu toqqammavigisamut tunniunneqartassapput, paasiniaanerit allatigut pinngitsoortitsisut taamaattussaatinngippassuk. Pasisaasup, unnerluutigisaasup eqqartuussaasullu inuttut atugaat tarnikkullu qanoq issusianik paasissutissat pissarsiarineqartut noqqaaneq tunngavigalugu tunniunneqartassapput tunaartarisamut, pasisaq, unnerluutigisasq imaluunniit eqqartuussaasoq akuersilluni nalunaarsimappat.

Imm. 3. Toqqaanerup nalaani politiit toqqammavigisaq paasitissavaat pasineqartup, unnerluutigineqartup imaluunniit eqqartuunneqartup inunnik nalunaarsimaffimmi najugaqarfianik sumiiffianillu nalunnginneqartumik kingullermik. Politiit ilanngullugu toqqammavigisap piunasaqarneratigut toqqammavigisaq paasissutississavaat pasisaasup, unnerluutigisaasup imaluunniit eqqartuussaasup inunnik nalunaarsuiffimmi sumiiffianik aamma najugaqarfianik ilisimaneqartumik kingullermik.

§ 11. Suliani Højesteretimit ingerlatinneqartussani Naalagaaffiup Unnerluussisussaataata suliarissavai, naammassinninnermik inassutip nalunaarutigineqarnera tikillugu, suliassat §§ 4, 5 aamma 10 naapertorlugit politiinit suliassarititaasut.

§ 12. Kalaallit Nunaanni Eqqartuussiviit piunasaqartoqarneratigut pisariaqartitat naapertorlugit aamma Kalaallit Nunaanni Eqqartuussisarnermik inatsimmi aalajangersakkat naapertorlugit nalunaarummilu matumani § 9, imm. 3-mi aamma § 10, imm. 2-mi aalajangersakkat naapertorlugit suliaq pillugu aamma toqqammavigisap pisinnaatitaaffii pisussaaffiilu pillugit toqqammavigisaq paasissutississavaat.

§ 13. Napparsimmaviup imaluunniit napparsimmaviup immikkoortortaata, sullissiviup imaluunniit inissiisarfiup il.il. inummik inissiisorisaqalersussat toqqammavigisamik toqqaaffiusimasut piaarnerpaamik toqqammavigisaq nalunaarfigissavaat, pineqartoq tassani inissisimasorineqalerniariartoq.

Imm. 2. Napparsimmaviup imaluunniit napparsimmaviup immikkoortortaata, sullissiviup imaluunniit inissiisarfiup il.il. inummik inissiisorisaqalersussap taamattaq toqqammavigisaq nalunaarfigissavaat pineqartup tassani inissisimanerata naaneramik.

§ 14. Napparsimmavimmi imaluunniit napparsimmaviup immikkoortortaani, sullissivimmi imaluunniit inissiisarfimmi il.il. inummik inissiisorisaqalersussami sulisut taamattaq toqqammavigisaq nalunaarfigisassavaat pineqartumut paasissutissanik pisariaqartunik tamanik, taassuma suliani isumannaatsumik ingerlassinnaaqqullugu. Paasissutissat nakorsatut sulinermik tunngaveqartumik pasineqartumut, unnerluutigineqartumut imaluunniit eqqartuussaasumut tunniunneqartassanngitsut aamma toqqammavigisamut tunniunneqartassanngillat.

Imm. 2. Toqqammavigisaq pisinnaatitaavoq paasissutissanik pinngitsoorani nalunaarutigineqartartussat imarisaannik pasisamut, unnerluutigisamut imaluunniit eqqartuussaasumut toqqaagaaffigisaminut tunngasunik ilisimannilissalluni.

Imm. 3. Toqqammavigisaq aammattaaq pisinnaatitaavoq pasisap, unnerluutigisap imaluunniit eqqartuussap journalianik ilisimannilissalluni, ilagitillugit suliaritinneranut pilersaarutit, pineqartoq nammineq tamakkuninnga paasisaqarusuppat, aamma pineqartup akuersilluni nalunaarutigippagu tunaartarisaaq journalimik paasiniaasinnaasoq.

§ 15. Toqqammavigisaq nipangiussisussaataavoq.

Kapitali 4

Toqqagaaffiup qaangiunnera il.il.

§ 16. Pinerluttulerinermik suliamut atasumik pasisamut, unnerluutigisamut imaluunniit eqqartuussaasumut toqqammavigisatut toqqagaaffik qaangiutissaaq, imaasippat eqqartuussineq kinguneqanngitsoq tarnikkut napparsimmavimmut imaluunniit napparsimmaviup immikkoortuanut, inunnik tarnikkut annertuumik innarluutilinnut isumaginniffimmut imaluunniit nakkutilliivimmut il.il. inissiinermik eqqartuussinermilluunniit, taamatut inissiinissamut periarfissiisumik, tak. Kalaallit Nunaanni Pinerluttulerinermik Inatsimmi §§ 157 aamma 161, aalajangiineqanngitsoq.

Imm. 2. Kalaallit Nunaanni Pinerluttulerinermik Inatsimmi § 163, *Imm. 2* naapertorlugu eqqartuussaasumut toqqammavigisatut toqqagaaffik qaangiutissaaq, eqqartuussutikkut pineqaatissiissut qaangiulluni atuukkunnaarpat.

Imm. 3. Toqqammavigisatut toqqagaaffik aammattaaq qaangiutissaaq toqqammavigisatut toqqagaasoq allamik taarserneqarpat.

Imm. 4. *Imm. 1* aamma 2-mi aalajangersakkat napertorlugit toqqammavigisatut toqqagaaffik qaangiuppat, toqqammavigisap taamaattoq pasisaaq, unnerluutigisap imaluunniit eqqartuussaasoq ikiussavaa naammagittaalliuutinik toqqammavigisatut qaangiuffiup nalaani aallartisarneqarsimasunik.

§ 17. Toqqammavigisassaq qaquguluunniit piunasaqarsinnaavoq toqqammavigisanut nalunaarsuiffimmit piiarneqarnissaminik.

Imm. 2. Toqqammavigisassaq toqqammavigisanut nalunaarsuiffimmut ivertitaasimasooq suliamit suliunnaarsinneqassaaq pineqartoq pisussaaffiit suliamut attuumassutillit annertuumik sumiginnarsimagunigit, imaluunniit allatigut malunnarsippat taanna suliamut naleqqutinngitsuusoq. Suliunnaarnek pippat, pineqartoq toqqammavigisassanik nalunaarsuiffimmit piiarneqassaaq.

Imm. 3. *Imm. 2* naapertorlugu toqqammavigisatut suliamit suliunnaarsitsinermik aalajangerneq toqqammavigisanut Kalaallit Nunaanni najugaqartunut pissaaq Kalaallit Nunaanni Politimesterimit toqqammavigisanullu Danmarkimi najugaqartunut Pinerluuteqarsimasunik Nakkutilliivimmit, tamatumunnga, tak. § 2

Imm. 4. Toqqammavigisassanut nalunaarsuiffimmit *imm. 1* imaluunniit *imm. 2* naapertorlugit piiaaneq kinguneqarpoq pineqartumik toqqaaqqinneq pisinnaasassanngitsoq. *Imm. 2* naapertorlugu piiaanerup kingunerissavaattaaq nangittumik toqqagaaneq piaarnerpaamik

unnerluussisussaataasumit eqqartuussivinnut suliassiissutigineqassasoq.

Imm. 5. Toqqammavigisat toqqammavigisanut nalunaarsuiffimmut ivertinneqarsimannigitsut imm. 2-mi piunasaqaammut atatillugu sulianit peerneqarsinnaapput. Tamatuminna aalajangiineq pissaaq eqqartuussivinni.

Kapitali 5

Aningaasarsiat

§ 18. Toqqammavigisamut toqqammavigisanut nalunaarsuiffimmi ivertinneqarsimasumut Kalaallit Nunaanni najugalinnut, aamma pasisamut imaluunniit pinerluttulerinermik suliap ingerlannerani toqqagaasimasumut aningaasarsiatut 1.488 kr. akiliutigisassavai.

Imm. 2. Toqqammavigisamut toqqammavigisanut nalunaarsuiffimmi ivertinneqarsimasumut Kalaallit Nunaanni najugalinnut, eqqartuunneqarsimasumullu toqqammavigisatut toqqagaasimasumut ukiumut tunngaviusumik aningaasarsiat 1.984 kr. akiliutigisassavai. Kalaallit Nunaanni Politimesterip aamma aningaasarsiatut akiliutigisassavai 1.488 kr. toqqammavigisanut qaammatit pingasukkuutaat aallaqqaataanni, eqqartuussaasup eqqartuussissut malillugu inissisimaffigisaani.

Imm. 3. Toqqammavigisat Kalaallit Nunaanni najugallit tamarmik eqqartuussinerup ingerlannerani najuunnerminnut atasumik aamma ukiumoortumik tallimariarnerit angullugit pulaartarnerminnut angallannermut aningaasarsianut matusissutissanik pisassapput naapertuuttunik aamma uppernarsaasikkanik, imaalilluguli pulaarluni angalanermut aningaasartuutit qaangersimassanngilaat ukiumut 12.000 kr. Immikkorluinnaq ittuni Kalaallit Nunaanni Politimesteri aningaasartuutitut killigititamik qaangiisumik immikkut akuersissuteqarsinnaavoq. Pisariaqartumik tunniunneqartassapput unnuinermut nerinernullu unnuinermut atasumik matusissutissat naalagaaffimmi suliffilinnut malittarisassat atuuttut naapertorlugit. Aningaasartuutit pineqartunik matusissutissanik pisassaaq Kalaallit Nunaanni Politimesterimut saaffiginninnikkut.

§ 19. Københavnimi Kalaallit Illuutaata tunaartarisamut toqqammavigisat nalunaarsuutaanni ivertinneqarsimasumut Danmarkimi najugalinnut, pinerluttulerinermillu suliap ingerlannerani pasisamut imaluunniit unnerluutigineqartumut toqqagaasimasumut akissarsiatut akiliutigisavai 1.508 kr. Aammattaaq Københavnimi Kalaallit Illuutaata toqqammavigisamut qaammatit pingasut aallartinneri tamaasa 1.697 kr. aningaasarsiaritittassavai eqqartuussut naapertorlugu eqqartuussap inissisimanerani.

Imm.2. Toqqammavigisat imm. 1-imi pineqartut aamma piunasaqarsinnaapput angalanermut pisariaqarneratigullu eqqartuussinermi sulianut peqataanermut atasumik unnuinermut sullitamullu pulaarnermut aningaasartuutitut matusissutissanik naalagaaffimmi suliffilinnut malitassiat naapertorlugit. Unnuinermi aamma tunniunneqassapput nerisanut aningaasartuutitut matusissutissat naalagaaffimmi suliffilinnut malittarisassat naapertorlugit. Aningaasartuutitut pineqartunut matusissutissat tunniunneqarnerat pisassaaq Kalaallit Illuutaannut Københavnimiittumut saaffiginninnikkut.

Imm. 3. Toqqammavigisat, toqqammavigisat nalunaarsuutaannut ivertitaasimanngitsut, kisianni eqqartuussaasimasumut Danmarkimi inissinneqarsimasumut toqqagaasimasut, piumasaaqatigisinnaavaat angalanermut aningaasartuutit aamma eqqartuussivimmi sulianut atasumik pisariaqartumik unnuinermut aamma ukiumut aqqaneq-marluk angullugit pulaariartorluni angalanerminut matussutissanik pinissaq naalagaaffimmi suliffilinnut malittarisassat naapertorlugit. Unnuinermut atasumik aamma tunniunneqartassapput nerinermut aningaasartuutitut matusissutissat naalagaaffimmi suliffilinnut malittarisassat naapertorlugit. Aningaasartuutitut pineqartunut matusissutissat tunniunneqarnerat pisassaaq Kalaallit Illuutaannut Københavniittumut saaffiginnikkut.

§ 20. Aningaasartuutit § 18, imm. 1-imi aamma 2-mi, aamma § 19, imm. 1-imi pineqartut matussusissavaat toqqammavigisap sulinermut, eqqartuussinermi peqataanermi sulianut, naammagittaalliuutinik sulianut il.il. tunngasunik aningaasanik pisartakkat saniatigut aamma aningaasartuutit suliamut attuumassuteqartut, tassunga ilagitillugit oqarasuaammut il.il.

Imm. 2. Aningaasarsiat (tunngaviusumik aningaasarsiat apriliip 1-at, 2016 tunngavigalugu) ukiumoortumik nalimmassarneqartassapput Kalaallit Nunaanni aningaasanut inatsimmi Kalaallit Nunaanni akit aningaasarsiallu nalimmassarneqartarneranni procentiliussamik.

Imm. 3. Aningaasat (tunngaviusumik aningaasarsiat apriliip 1-at 2000 tunngavigalugu) ukiumoortumik nalimmassarneqartassapput nunap immikkoortuini atorfilinnut nalimmassaanermut procenti sukkulluunniit atuuttoq malillugu.

Imm. 3. Pisuni immikkorluinnaq ittuni Kalaallit Nunaanni Politimesterip aamma Pinerlussimasunik Nakkutilliiviup Pisortaqarfiata Kalaallit Illuutaannit Københavniittumit innersuussuteqarnikkut suliap annertussusia ilisimallugu aningaasarsiat § 18, imm. 1-imi 2-milu aamma § 19, imm. 1-imi pineqartut qaffassinnaavaat apparsinnaallugilluunniit.

Kapitali 6

Atuutilerfia il.il.

§ 21. Nalunaarut atuutilersinneqarpoq maajip 1-ani 2016.

Imm. 2. Nalunaarut taamatuttaaq atuutissaaq toqqammavigisat pillugit nalunaarutip atuutilersinneqarnerani toqqagaasimasunut.

Imm.. 3. Inatsisinik Atortitsinermut Ministereqarfiup Toqqammavigisassanut Kalaallit Nunaanni Pinerluttulerinermut Inatsit naapertorlugu toqqagaasimasunut ilitsersuussutaa juunip 17-ianni 1998-imeersoq atuukkunnaarpoq.

Jusititsministeriet, ulloq 19. april 2016

SØREN PIND

/ Anders Aagaard